

29/12/2003

Pembangunan wanita dipertingkat

Fadzlena Jafar

BAJET 2004 yang diumumkan pertengahan September lalu pastinya berita terbaik bagi wanita sepanjang tahun ini. Bermula dengan peruntukan sejumlah RM128.6 juta untuk institusi kekeluargaan dan pembangunan wanita serta cadangan kerajaan menambah kadar pelepasan cukai anak dari RM800 kepada RM1,000 seorang bagi meringankan beban perbelanjaan ibu bapa, Bajet 2004 tentunya dilihat sebagai bajet yang mesra wanita.

Peningkatan jumlah itu berbanding RM99.1 juta yang diperuntukkan pada Bajet 2003 membuktikan kerajaan menyedari betapa pentingnya pembangunan institusi kekeluargaan dan juga wanita dalam agenda pembangunan negara, sekali gus menyuntik semangat kepada wanita tahun ini.

Perdana Menteri ketika itu, Dr Mahathir Mohamad ketika mengumumkan Bajet 2004 pertengahan September lalu, berkata kerajaan menyedari bahawa kos membesarkan dan mendidik anak-anak kian meningkat dan cadangan pelepasan cukai itu diharap dapat membantu ibu bapa meringankan beban perbelanjaan mereka.

Pada pembentangan Bajet 2004 itu, Dr Mahathir turut mengumumkan kerajaan akan melaksanakan pelbagai program untuk pembangunan institusi keluarga dan wanita, termasuk latihan, bimbingan, kaunseling dan pendedahan untuk memberi keyakinan dan dorongan kepada wanita, khususnya ibu tunggal, warga tua dan orang kurang upaya.

Ibu tunggal terus mendapat perhatian dalam Bajet 2004 dengan galakan sebanyak RM100 juta dari Skim Kredit Desa khusus bagi mereka yang mempunyai perusahaan sendiri di desa bagi meningkatkan pendapatan masing-masing.

Malah, ibu tunggal yang berpendapatan rendah juga akan diberi keutamaan dalam memperoleh rumah kos rendah dan sederhana rendah daripada Syarikat Perumahan Negara Berhad (SPNB) dengan diberi diskaun harga sebanyak 20 peratus.

Selain itu, penyediaan pusat penjagaan kanak-kanak di tempat kerja turut mendapat perhatian Bajet 2004. Bagi menjayakan hasrat untuk melihat lebih banyak pusat penjagaan berkenaan ditubuhkan, kerajaan mungkin menjadikan penubuhan pusat itu sebagai syarat dalam 'keutamaan pembangunan' oleh majlis tempatan.

Sidang Kemuncak Hari Wanita Ogos lalu turut mencetuskan beberapa idea bagi pembangunan wanita. Antaranya, waktu kerja yang lebih fleksibel dan kemudahan bekerja dari rumah untuk kerjaya tertentu.

Awal September lalu, Dr Mahathir dalam jawapan bertulisnya di Parlimen berkata kerajaan akan meminda Akta Pekerjaan 1955 bagi memasukkan peraturan kerja baru dan anjal bagi meningkatkan penyertaan wanita dalam sektor pekerjaan.

Pindaan itu termasuk memasukkan peraturan telekerja, kerja separuh masa dan perkongsian kerja bagi membolehkan wanita menggabungkan kerjaya dan tanggungjawab rumah tangga.

Sejajar dengan itu, Kementerian Pembangunan Wanita dan Keluarga menggalakkan konsep rumah sebagai pejabat bagi memberi peluang kepada wanita memilih untuk bekerja di rumah.

Bagi merealisasikan cadangan itu, Menterinya, Datuk Seri Shahrizat Abdul Jalil, berkata bahagian dasar kementerian itu sedang mengkaji langkah yang perlu dilakukan sebelum mengemukakan memorandum kepada Kabinet awal tahun depan berhubung konsep terbaik bagi menjayakan cetusan idea berkenaan.

Isu kesaksamaan gender turut menjadi fokus pada Sidang Kemuncak Hari Wanita. Datuk Seri Abdullah Ahmad Badawi, yang ketika itu masih Timbalan Perdana Menteri dalam ucapannya merasmikan sidang berkenaan memberi keyakinan bahawa kerajaan tidak mengamalkan diskriminasi terhadap pekerja wanita. Malah, beliau turut menegaskan kerajaan akan tetap memberi

kepercayaan kepada wanita berkebolehan dan berpendidikan yang layak untuk memegang jawatan pada peringkat pembuat keputusan di sektor awam dan swasta.

Sementara itu, Dialog Wanita Pertama, bertemakan Melabur Dalam Keamanan yang diadakan kali pertama sempena Sidang Kemuncak Ke-13 Pergerakan Negara Berkecuali (NAM) Februari lalu turut mencapai kata sepakat mengenai pentingnya keamanan dan menyampaikan mesej kepada pemimpin dunia bahawa keamanan global adalah lebih penting daripada peperangan.

Isu keamanan sejagat turut menjadi fokus perbincangan Dialog Wanita Pertama yang diadakan sempena Sidang Kemuncak ke-10 Pertubuhan Persidangan Islam (OIC), Oktober lalu.

Selain isu sejagat dan pembangunan wanita, turut menjadi perhatian wanita tahun ini pastinya isu kontroversi cerai menerusi sistem pesanan ringkas (SMS). Sikap suami yang menggunakan SMS untuk menjatuhkan talak disifatkannya sebagai 'merendahkan martabat dan maruah wanita' dan tidak menunjukkan penghargaan kepada institusi perkahwinan serta keluarga, termasuk anak sendiri.

Satu lagi isu kontroversi tahun ini ialah apabila Perlis menawarkan negerinya menjadi destinasi berpoligami untuk menghentikan amalan rakyat Malaysia menyeberangi sempadan ke Thailand untuk tujuan demikian.

Tawaran itu dianggap memudahkan pasangan yang ingin berpoligami tanpa kebenaran isteri pertama dan mendaftarkan pernikahan di Malaysia.

Selain itu kes perceraian tertunggak masih menjadi perhatian umum. Bagi mengendalikan pelbagai kes berkaitan kekeluargaan, kerajaan kini bersetuju menubuhkan Mahkamah Keluarga yang akan mempunyai dua komponen utama iaitu Mahkamah Sivil dan Mahkamah Syariah.

Justeru, bagi melicinkan pengendalian kes di mahkamah berkenaan, beberapa undang-undang seperti Undang-undang Pendaftaran dan Perceraian 1976 akan dipinda yang membolehkan Mahkamah Syariah dan Mahkamah Sivil berkongsi kemudahan pengendalian kes terbabit.